

Parlamento a haya presentacion riba progreso di ehecucion di Landspakket

Ayera den Parlamento di Aruba a tuma luga un reunion publico den cual prome minister demisionario Evelyn Wever-Croes, hunto cu un grupo di profesional, a duna un splicacion riba e progreso di ehecucion di Landspakket.

Durante e reunion e profesionalnan encarga cu e accionnan di Landspakket a duna presentacion na miembronan di Parlamento. Prome minister a remarca cu e presentacionnan cu a tuma luga ta presentacionnan tecnico y no politico.

Indra Zaandam, e persona encarga cu e coordinacion di tur e trabounan, a elabora riba diferente punto, entre otro cambionan den uitvoeringsagenda y introduccion di un formato nobo.

Manera ta conoci dia 13 di november 2020 Aruba a firma un acuerdo cu Hulanda pa loke ta e sosten financiero cu a ricibi den forma di un prestamo den cual a acorda un pakete di reforma, e Landspakket.

Zaandam a splica cu e forma di traha di locual tin aworaki a ser ankra den ley, den un onderlinge regeling, dia 4 di april 2023. Esey ta e forma di e cuadro legal den kico nan ta traha. El a indica cu por wak e Landspakket como un 'documento madre' (moederdocument) y for di esey e uitvoeringsagenda y e uitvoeringsrapportage ta sali cada kwartaal. E uitvoeringsagenda ta duna un planificacion di kico ta e reformanan cu kier bay duna contenido na dje y uitvoeringsrapportage ta un reportahe di con e reformanan aki a bay.

Pa loke ta e parti di governance, el a menciona cu tin



un tijdelijkwerkorganisatie (TWO) Aruba, cual ta un ekipo di ambtenaarnan cu ta esnan cu ta encarga cu e contenido. TWO Aruba ta comunica cu TWO na Hulanda y tambe ta reporta na prome minister cu ta coordina e trayecto general. Naturalmente cada minister tin nan responsabilidad individual.

El a indica cu e uitvoeringsagenda actual ta consisti di ocho tema, 30 reforma y mas di 105 accion y proximamente ta bay tin cambio den e uitvoeringsagenda y uitvoeringsrapportage.

Zaandam a splica cu pa algun luna hunto cu e team di Aruba nan ta trahando hopi duro riba un formato nobo, cual el a resalta ta un trabou extenso y intensivo. Esaki a resulta for di diferente combersacion unda a ripara cu lo kier haci na Aruba, pero tambe for di Hulanda, e uitvoeringsagenda y uitvoeringsrapportage mas accesibel pa un grupo mas grandi di hende.

El a indica cu internamente nan ta papia facil di e temanan den e Landspakket, pero ora sali pafo esaki no ta e caso y no tabata e intencion di e Landspakket tampoco pa ta menos accesibel, e intencion ta pa un grupo grandi por sigui e informacion pa locual ta trata e reforma.

El a splica cu poco poco a tuma e decision pa no solamente papia di accionnan specifico, pero pa bay wak kico ta ser realisa riba nivel di impacto y ki impacto e diferente accionnan tin berdaderamente.

Pa e motibo ey ta bay introduci un formato nobo y ta spera cu den november venidero por presenta esaki. Cu esaki, el a sigui splica, ta bay monitor hopi mas e resultado y impacto.

Cu e formato nobo tambe nan kier haci e proceso mas eficiente den e sentido pa no tin prome un uitvoeringsagenda, despues un uitvoeringsrapportage, cual Zaandam a remarca

tabata un peso grandi pa e ekipo local pasobra nan mester a traha riba varios rapportage den poco tempo.

El a indica cu e cambio e ta bira mas eficiente y ta bira menos pisa pa e ekipo. Ademá, cu introduccion di e cambio ta bay saca e uitvoeringsagenda y uitvoeringsrapportage dos biaha pa aña so en bes di cuater biaha pa aña pa asina duna e ekipo local y na Hulanda e espacio pa por haci e trabou.

El a sigui splica cu e porcentahe di e trabou administrativo ta bay verschuif di hopi mas administratie pa hopi mas uitvoering, cual ta e punto di salida.

El a subraya cu e ekipo ta dunando bon contenido na e reformanan, ta trahando duro, cada persona ta responde na tijdelijkwerkorganisatie Aruba y semper t'ey pa contesta y contribui, pero na mesun momento ta ripara cu e capacidad administrativo di plan di enfoke di rapportages ta pisa.

El a agrega cu tin hopi espacio pa crea un sistema na unda e ta pas cu un pais chikito, pero na mesun momento ta duna informacion suficiente y frecuentemente pa asina por sigui coordina e reformanan.

Zaandam a enfatisa cu e tema di capacidad legislativo ta un reto na Aruba pa diferente motibo y den cuadro di Landspakket, el a indica, tambe trahando riba esaki. El a indica cu pa loke ta e aspecto di analisis di beleid, pa yega na legislacion mester sa ki ora ta necesario pa cambia un problema y kico e problema ey ta.

El a resalta cu biaha beleid por ta un instrumento pa atende cu un problema y no semper mester legislacion. Door di enfoca riba e parti di beleid y haci miho analisis, e ora por haci priorisacion di cual aspecto of cual problema ta necesario pa soluciona cu ley.

El a agrega cu e parti di registro di ley y digitalisacion tambe ta bay ta importante tambe ta un punto importante.

Otro tema cu Zaandam a trece dilanti ta e tema di depositogarantiestelsel (DGS). Esaki, el a splica, ta un tema hopi specifico cu tin di haber cu sector financiero y ta un sistema di seguridad pa hendenan cu tin nan placa na banco. El a indica cu Banco Central di Aruba hunto cu DWZ y Nederlandse Bank ta trahando riba esaki y tin un landsbesluit y un landsverordening pa esaki aworaki.

El a enfatisa cu no ta bay ta un trayecto facil pa trece cambio den esaki pasobra e no ta rekeri solamente cambio legislativo, pero tambe cambio organisatorio y e combersacionnan ta sigui entre pais Aruba hunto cu Banco Central.

Tocando e tema di kansspelautoriteit (autoridad di weganan di suerte), Zaandam a indica cu nan ta den combersacion cu Hulanda pa apunta un kwartiermaker. El a agrega cu tabatin algun reto cu e forma di apuntamento, pero aworaki a yega na un solucion pa esey y otro aña lo cuminsa sondeo di un kwartiermaker pa establece un autoridad di weganan di suerte cu a base di e landsverordening lo monitor e sector aki na Aruba.

Por ultimo, el a splica cu deelneming en dividendbeleid (politica di participacion y dividendo) tin di haber cu gestion financiero. Pa esaki, el a indica, nan ta trahando cu TWO di Hulanda y un consultador externo pa asina establece un politica di participacion y dividendo pa establece reglanan concreto pa locual ta relacion di Pais Aruba cu entidadnan gubernamental. El a menciona cu den un trayecto di algun luna ta spera por tin un politica di participacion y dividendo cu ta contribui e ora na e gestion financiero.

Mas informacion tocante e ehecucion di Landspakket den nos siguiente edicion.

